

Ulluunerani paaqqinnittarfinni meeqqat minnerit toqqissisimanissaat, atugarissaarnissaallu qanoq qulakkeersinnaaneripput pillugu, apeqquteqaat aallaavigalugu oqallinnissamik siunnersuut

(Inatsisartunut ilaasortaq, Pipaluk Olsen, Demokraatit)

Akissuteqaat

(Meeqqanut, Inuusuttunut, Inatsisit Atuutsinneqarnerannut Naligiissitaanermullu Naalakkersuisoq)

Siullermeerneqarnera

Naalakkersuisut meeqqat minnerit ulluunerani paaqqinnittarfinni toqqissisimanissaat atugarissaarnissaallu pillugit ernumaqataapput. Meeqqat meeraaneranni ulluinnarni toqqissisimanermik aalajaatsumillu avatangiiseqarneq meeqqat ineriartornerannut pingaaruteqarluinnarpoq, aammalu kingusinnerusukkut inuunermi atugarissaarnissamut ilikkarnissamullu tunngaviullutik.

Toqqissisimaneq aalajaatsuunerlu nukittorsarniarlugit Naalakkersuisut ulluunerani neqeroorutit pillugit piginnaasat ineriartortinneqarnissaat siunertaralugu aalajangersimasumik suliniuteqarput. Piginnaasatigut ineriartortitsinnermut atatillugu sulisut perorsaannermut tunngasunik aammalu attaveqaqatigiinnikkut piginnaasaannik nukittorsaasoqartarpoq, ilaatigut meeqqat minnerit pisariaqartitaannik soorlu qanilaarnermik, naatsorsuutiginnissinnaanermik aammalu inersimasunik aalajaatsunik attaveqarnissamut pisariaqartitaannik naammassinnissinnaaneq. Suliniutit ilaatigut attaveqaqatigiinnermik piginnaasanik aammalu perorsaanikkut periutsinik meeqqanut ulluinnarni atugarissaarnermik ineriartornermillu tapersersuisunik imaqarput.

Angajoqqaanik suleqateqarneq aamma sulinermi pingaarutilittut ilaavoq. Angajoqqaat pingaarutilittut isigineqarput, angajoqqaanillu suleqateqarluarneq meeqqamut toqqissisimanermik ingerlaavartitsinnermillu pilersitseqataasinnaavoq, sulisut allanngorarnerisa nalaanniikkaluarpataluunniit. Sulisut angajoqqaanik toqqissisimanartumik tatiginninnermillu tunngaveqartumik suleqateqarsinnaanissaat tapersersorneqartarpoq, taamaalilluni meeqqamut atatillugu angerlarsimaffiup ulluuneranilu paaqqinnittarfiup akornanni ataqatigiinneq pilersinneqarsinnaaqqullugu..

Tunngaviit arfineq marluk meeqqanut suli atualinngitsunut perorsaanikkut ulluunerani neqeroorutit pillugit Inatsisartut inatsisaannut naapertuuttumik ataatsimoorussatut suliassatigut tunngaviusut atornerqartarput, tassani siunertaralugu pitsaassutsimik ataatsimoorussamik paasinninneq aammalu perorsaanikkut sulineq nukittorsarneqarnissaa.

Naalakkersuisut aamma piginnaasatigut ineriartortitsineq sulisut attatiinneqarnissaannut sakkussatut isigaat. Sulisut suliassatigut nukittorsagaagunik aammalu sulinerminni tapersersorneqartutut misigigunik, tamanna annertunerusumik atugarissaarnermik aammalu sulisut ingerlaavartumik taarsaannerisa annikinnerulernerannik kinguneqarsinnaavoq, meeqqanullu ingerlaavartumik aalajaatsumik avatangiiseqalerneramik nukittorsaalluni.

Naalakkersuisut isumaqatigaat ulluunerani paaqqinnittarfiit amerlasuut pitsaasunik misilittagaqartuusut, taamaattumillu taakku aaqqissuussaannerusumik avitseqatigiissutigineqartariaqartut.

Taamaattumik Naalakkersuisut isumaqarput kommunit akornanni ilisimasanik avitseqatigiinneq nukittorsarneqartariaqartoq. Tamanna pisinnaavoq ataatsimoorussanik

piginnaasatigut ineriartortitsinermik ingerlatsinikkut, attaveqaataasarnikkut aammalu misilittakkanik paarlaasseqatigiinnikkut, tassani periutsit pitsaasut avitseqatigiissutigineqarlutik ineriartortinneqarsinnaaqullugit. Peqatigisaanik pingaaruteqarpoq naleqqiussinerit ilinniarnerrillu najukkani pissutsinut aallaaveqarnissaat, taamaalilluni aaqqiissutit piviusorsioertut atorneqarsinnaasullu sumiiffinni pilersinneqarsinnaaqullugit.

Naalakkersuisut kommuninik ulluunerani paaqqinnittarfiit ulluinnarni ingerlatsinerannut akisussaasunik suleqateqarneq ataqqillugu attatiinnarneqarnissaa pingaartippaat. Peqatigisaanik Inatsisartut Naalakkersuisut peqatigalugit inatsisilerinikkut ersarissunik sinaakkutissiinissamut, ataatsimoorussanik suliatigut tunngaveqalernissamut aammalu kommunit suliasaminnik naammassinnissinnaanissaannut pisariaqartunik atugassaqartitsinissamut akisussaaffeqarput. Tamanna ilaatigut pisinnaavoq inatsisiliornikkut, nuna tamakkerlugu ilitsersuinikkut, piginnaasatigut ineriartortitsinikkut aammalu kommuninik suliasaqarfimmi unammilligassat pisariaqartitallu pillugit oqaloqateqarnikkut. Naalakkersuisut suliasarinngilaat kommunit suliarisartagaannik tiguaanissaq, kisiannili kommunit meeqqat minnerit atugarissaarnissaannik toqqissisimanissaannillu qulakkeerinnissinnaanissaannut pitsaanerpaamik sinaakkuteqarnissaat pilersitsissallutik.

Taama oqaaseqarluta oqallisissioertuq pingaarutilimmik oqallisissiaqarneranut qutsavigaarput inatsisartunilu oqallinnissaq soqutiginaruq malinnaaffigeqqissaassavarput.